

Tiwei Pol Kewisik Ken Mit Ne Galesia

Menmen me tiwei ik

Pol kewepyapir menmen mau mekre han kirak *1:1-10*

Pol naanmipre hirekes me hirak keit eniuk iuwe aposel *1:12-2:21*

Him me menmen yaaim God kerekyeyem *3:1-4:31*

Menmen mit ne weiwik me God hir nanisesim enentar hir epei ninaaiwir
menmen enum *5:1-6:10*

Pol katip mit ne Galesia him mikaru *6:11-18*

1 ¹Hi aposel Pol. Mit hir netpo neriuweta hi hatip mit him me God au. God ap katip mitik hak hirak kehimitena hi hatip mit him mirak yaaim. Jisas Krai kerekek ketike God Haai kerek nipaa hirak kikiak Jisas nipaa kaa ek, hirakit keretet tehimitena hi hire aposel hi hatip mit him yaaim me God. ²Hi Pol hetike mit nai in kerek haiu miriak menmen miutip, haiu matip yi mit ne weiwik me God yerer wit wit yau provins Galesia, yi yaain. Hi Pol hesiuwe tiwei ik ken yi mit en.

³Hi hanhan God Haai kiau ketike Mitik Iuwe kiau Jisas Krai hirakit hanhan teriuwi yi eiyu werek werek. ⁴Krai hirak kises han ke God hirak Haai kiau, hirak kaa kesak menmen enum maiu kekepai keriyei haiu minaiwir menmen enum mau ti mari han kiau me wi in ek. ⁵Hi hanhan haiu mit emwenipi niuk mirak iuwe tipmain tipmain enum eik.

Him yaaim miutip mepu keremem

⁶Hi han kekrit iuwe hentar yi yinaaiwir God nipaa kari han ki keriuwe menmen yaaim Krai kerekyiyem weinim nipaa wi hirak kaa. In ek yi yinaaiwir him mirak yaaim waswas, yi yises him ham yi han kitet hiram yaaim mamkepi yi yises God. ⁷^dTe him ham yaaim mepu mamkepi mar im au. Him miutip kerek nipaa hi hetpiyem hiram keremem mamkepi yi

^a 1:1 Ga 1:11-12 ^b 1:3 Ro 1:7; Fl 1:2 ^c 1:4 Ga 2:20; 1Ti 2:6; Ta 2:14; 1Jo 5:19 ^d 1:7 Ap 15:1, 24

eiyses God werék werék. Hi atíp menmen im hentar mít han enun nari han ki, hir hanhan nanweikin him yaaim me Kraís mamno him ham ham enum memipin. ^{8 e}Te haiu hiras o mitik ensel ke wit ke God kaknen, haiu mamitpi him ham me him nípaá haiu metpiyem, neimin nanriak menmen im hi hanhan God kakrekýor enum kakiwaanki nanikre si. ⁹Haiu epei metpiyem, te in ek haiu pike metpiyem meteipim. Mít kerek epei nan netpi him ham me him nípaá yi yemtewem yisesim, hi hanhan God kakrekýor enum kakiwaanki nanikre si.

^{10 f}Yi han kitet hi hewis menmen im hetpim, te mít hir han yaaik nanriuwa a? Taauye! Hi hiriak menmen te God han yaaik kakiriuwa kerekék. Hi hiriak menmen im enip mít hir han yaaik nanriuwa, te hi ap hiriak menmen me Kraís au. Hi hiriakem me mít keriyen.

Pol keteikin mít God kerekék kehimitanek hirak kire aposel

^{11 g}Nai yinan, hi hanhan te yi eiýirtei werék werék him yaaim me Kraís hi nípaá hetpiyem mít ap neket han em netpim au. ^{12 h}Mitik hak ap ketpo him im keteiknewem au. Jisas Kraís kerekék ketpewem keteiknewem.

^{13 i}Him im yaaim mentar yi epei yemtau menmen enum hi hiriakem nípaá hi hises menmen mít ne Isrel hir nisesim. Hi epei hiriak enum iuwe me mít miyapir ne weiwik me God, hi hanhan anip nani. ^{14 j}Hi epei hinin nai ne watiu miutip ne mít nau ne him haiu mít ne Isrel misesim. Hi hinini hentar hi nepei hises menmen wisenum me menmen maamrer nau niriakem han kitet God han yaaik keriuwerem.

^{15 k}Te nípaá hi hekre tu ke miye pai, God hirak han kitet hiram yaaim te hirak kehimitena hi kirak. Maain hirak kerekýo yaaim ketpo menmen te hi hiriak menmen mirak. ^{16 l}Hirak ketpo menmen te hi hiriak menmen mirak, hirak keteikno Nikan kirak hirak keimin, te hi hatip mít him yaaim me Kraís. Him im men mít ap ne weiwik me Isrel au. Me wi God kerekýewem, hi ap atíp mít han hitorhi hiram yaaim hi hire aposel o au. ¹⁷Hi ap hitet yayiwe hinu hen wit Jerusalem hir mít aposel ein kerek nípaá God kehimitenor ninin natip mít him mirak, hi hitorhi me menmen au. Wasenum, hi hen wit Arebia kerek wit enuk mít niutip niutip newiyen. Te maain, hi pike han wit Damaskas.

^{18 m}Maan, tito wikak epei men, hi han hitet yayiwe hinu hen hiun wit Jerusalem, hi hen hir Pita. Hi etikerek wau en wewepnak me wi hiswiyen hispinak (15) keremem. ^{19 n}Hi ap hir mít aposel han au, Jems hirak níkik ke Mitik Iuwe Kraís, hi hirek kiutipen kerekék. ²⁰Menmen hi hewisiyem hiram him yaaim. God kertei hi emitipin au.

^e 1:8 1Ko 16:22 ^f 1:10 1Te 2:4 ^g 1:11 Mt 16:17 ^h 1:12 Ga 1:1 ⁱ 1:13 Ap 8:3 ^j 1:14 Ap 22:3 ^k 1:15 Ais 49:1; Jer 1:5; Ro 1:1 ^l 1:16 Ap 9:3-6; Ga 2:7 ^m 1:18 Ap 9:26 ⁿ 1:19 Mt 13:55

²¹°Hi han hiun Jerusalem epei au, hi hen ti ke provins Siria ketike provins Silisia. ²²Te in ek, mit ne weiwik me God neit Judia hir ap nira hir au netari ninaan mai au. Hir nemtau mit han netpor him weinim keremem me hi mar im: ²³“Mitik kerek hirak kewep haiu mit ne weiwik miutip me God, hirak in ek katip mit him yaaim me Kraiss kerek hirak nipaa hanhan kakiwaaankem.” ²⁴Hir nemtau him me menmen God kerekewem, te hir newenipi niuk mirak.

Pol ketike mit han aposel niriak menmen miutip

2 ¹Maain, tito hiswiyen tekyaaait (14) nepei man men, hi Pol hetike mitik Banabas hawir pike witet yayiwe winiu wen wit Jerusalem. Hi heithis mitik Taitas hirak kan ketikewawir. ²Hi hen ein hentar God keteikno hirak hanhan hi ano. Hi hen hatip mit ein him yaaim hi hatip mit em herer wit wit hatip mit ap ne weiwik me Isrel em, te hi ap atip mit yapirwe rem au. Hi atip mit iuwe ne weiwik miutip me God ein keriyen. Hi hanhan hir enwenhi him yaaim hi hatip mit em. Hi hinaain te menmen nipaa hi hiriakem, o in ek hi hiriakem hiram mire menmen weinim hentar hir ap newenauhi him hi hetpim. ³°Taitas wariyakit kai, hirak ke Grik, hirak ap ke Isrel au, te hir mit iuwe ein ap natip hir enrekir yink kirak te hirak kakre mit ne Isrel hir nantikerek nanu niutip au. ⁴Haiu mit matip me menmen im mentar mit han hir nemipin nare hir naiu yinan, te hir ap nises him me Kraiss werek au. Hir hanhan nerekir Taitas yink kirak. Mit in hir epei nan nau nimin ke haiu mit haiu mepitari menmen hir nisesim. Hir nire mit enun newenainaan me menmen yaaim haiu misesim. Haiu minaiwir him lo me Moses me nipaa ein mit ne Isrel nisesim mentar haiu metike Kraiss Jisas mau niutip. Te mit han in hanhan neriyei haiu emises him lo me Moses me nipaa ein, te haiu pike mamu enum mamises him me nipaa ein mamre mit nau nekre winak enuk ke gavman. ⁵Haiu ap mises han kir mei kike au, te haiu naanempri him yaaim me Kraiss werek werek, te yi ap eiyises him ham enum mei mir mamtikerem au.

⁶°Mit ein hir mit niuk mir iuwe ninin mit han. (Hi han kitet hir iuwe hiram menmen weinim hentar God hirak han kitet haiu mit yapirwe haiu mipiran.) Hir mit niuk mir iuwe en, hir ap netpo him meiyam hir mit enisesim me him hi hatip mit em au. ⁷Hir nertei God keweto him yaaim kehimitena keriuweta hi hatip mit ap ne Isrel him mirak, har ke God kehimitan Pita hirak katip mit ne Isrel him yaaim me Kraiss. ⁸Nipaa God kikaap Pita hirak kewepyapir him yaaim mirak men mit ne Isrel. Mar im, hir nertei God kekepa kehimitena hi hatip mit ap ne Isrel him mirak

° 1:21 Ap 9:30 ° 2:1 Ap 15:2 ° 2:3 Ap 16:3 ° 2:4 Ap 15:1, 24; Ga 1:7, 5:1, 13 ° 2:6 Ap 10:34 ° 2:7 Ap 22:21

yaaim. ⁹Hir epei nertei menmen yaaim God kerekyewem kehimitena hi hatip mit him mirak yaaim, mit iuwe ne weiwik miutip me God neit wit Jerusalem, Jems, Sifas, tetike Jon hirakit teketawirhis teteiknawir hiram yaaim te hawir wen wit kerek mit ap ne Isrel newiyen, hawir wetpor him me God, hir nanino wit kerek mit ne Isrel newiyen hir netpor him me God. ¹⁰“Hir netpawir him miutip im keremem. Hir hanhan haiu mit mamit pewek mamsiuwerem mamno mit enun netenen menmen au hir nau neit Judia. Menmen im hi hanhanem, te hi hiriakem.

Pol kene Pita kentar menmen hirak kiriakem

¹¹Hi hetike Pita hawir watip mit him me God miutip keremem, te maain wi Pita kan wit Antiok kir mit en, hi henerek herp ninaan mirak hentar hirak kiriak menmen miutip enum. ¹²“Hi henerek hentar menmen miutip im. Nipaa mitik Jems keriuwet mit han nen wit Antiok. Pita kipaam menmen ere in ketike mit ap ne weiwik me Isrel. Maain mit kerek Jems keriuweti nan nipiun Antiok, Pita kinaaiwir mit ap ne Isrel ap kaam menmen ketikeri kentar hirak kinaain mit in ne Jerusalem. Hir wen nises him me Moses kerek nipaa matip mit kerek nises him me God hir enrekir yink kir, te Pita han kitet hir naninerek nanintar hirak ap kises him me Moses au. ¹³Mit han ne weiwik me Isrel nepu in, hir nipaam menmen ere in netike mit ap ne Isrel, hir niriak enum ninaaiwir mit en netike Pita. Banabas hirak kirek, te hirak kises enum, hirak ap kaam menmen ketikeri au. Hirak kinaiwiri. ¹⁴Hi hertei hir ap nises him yaaim me God werek werek au, te hi hatip Sifas me ninaan me mit miyapir yapirwe, hi hetpiwek har ik: “Ti mitik ke weiwik me Isrel, te ti ap hises menmen mit ne Isrel au. Ti hises menmen har ke mit ap ne Isrel hir nisesim. Ti henmak te in ek heriuwe menmen ti hisesim hinaaiwir mit ap ne Isrel, ti hari han kir te hir enises menmen mit ne Isrel niriakem a? Nipaa ein ti hirekes ap hisesim au. Ti hinaain mit ne Jems epei nan keriyen.”

Neimin nises him me Jisas kerekek God kaktip hir yaain kaktorhis

¹⁵Haiu mit kerek miyerer ninai, haiu mit ne Isrel. Haiu ap mar ke mit nerer wit wit ap ne weiwik me Isrel kerek haiu matip hir ap nises him me Moses. ¹⁶“Haiu mertei God katip mit han hir yaain kaktorhis nentar hir nises him lo me Moses au. Hirak kaktip hir yaain kaktorhis kakintar hir nises Jisas Krai. Haiu mit mises Jisas Krai kerekek, te God han kitet haiu yaain kaktaihis. Haiu mises menmen him lo me Moses metpaiyem, te haiu mire yaain taau. God ap katip mitik kiutip yaaik kaktiwekhis kakintar hirak kiriak menmen him lo me Moses metpim auye! ¹⁷Haiu

⁹ 2:10 Ap 11:29-30 ¹⁰ 2:12 Ap 11:3 ¹¹ 2:16 Ap 15:10-11; Ro 2:20-28, 4:5; 11:6; Ga 3:11

hanhan God kaktip haiu yaain kaktaihis kakintar haiu mises Krai
 kerekek. Te God au katip haiu emises him me Moses te hirak kaktaihis,
 haiu miriak menmen enum. Haiu emweikin sip emwet him me Moses, te
 haiu mamises him me Krai, te menmen im meteikin Krai hirak kenipai
 haiu miriak enum. Him im hiram yaaim a? Taauye! Krai ap kenipai
 haiu miriak enum au. Hirak kerekek kekepai haiu mises him me God
 werek werek hirak kaktaihis. ¹⁸*Hi nipaa eweikin sip ewet him lo Moses
 nipaa kewisim, te in ek hi pike ehisesim, hi heteikin mit him me Moses
 hiram wen mamkepa God kaktaihis, te hi hiriak enum. ¹⁹†Nipaa hi
 hises him me God nipaa Moses kewet haiu mit em, hi hertei hi enuk God
 kakrewaank te hi hahi. Te Krai hirak kekrehir kai, God kewaank hirak
 kaa kentar nu tentarakit. Hiram mar ke hi haa hetikerek, te him lo me
 Moses ap naanmiprau au. Te in ek hi hises han kai, te hi hises God. ²⁰‡Te
 in ek hiram mar ke hi ap hepu au, hi haa. Te Krai hirak kekrehir kai
 kekepa hi hepu. In ek hi hepu, te menmen hi hiriakem hi han kitet God
 Nikan kirak Jisas kerek nipaa han tewenina kaa, hirak kakikepa hi etike
 God hawir waukiyakit wawu han kiutip. ²¹Hi ap heweikin sip ewet him
 yaaim me Krai henip menmen yaaim God kerekyaayem hiram weinim
 au. God kaktip mit hir yaain nentar hir nises him mirak nipaa Moses
 kewet haiu mit em, te nipaa Krai ap kan au. Him me Moses mekepai te
 God kaktip haiu yaain taau. Krai kaa weinim au. Hirak kerekek kiriak
 God katip haiu mit haiu yaain. Him nipaa kerek Moses kewisim hiram
 taauye!

Mekam mekepi yi yau werek werek- Him me Moses o Him me Krai

3 ¹Yi yetaritari mit ne Galesia! Yi yenmak te yi yewis mit han nari
 han ki te yi ap yises him yaaim me Krai a? Haiu epei metpiyem
 werek werek hiram mar ke yi epei yirek hirak kaa kentar nu tentarakit.
²Hi hare ehitihi menmen ham miutip. Yi epei yeit God Himin Yaaik kan
 kekre han ki yentar yi yises him nipaa Moses kewet mit em o yentar yi
 yemtau him yaaim me Krai nipaa yi yisesim a? Him yaaim me Krai
 keremem! ³Yarkeik te yi yetaritari! God Himin Yaaik kekepi kari han
 ki te yi yinin yises him yaaim me Krai, te in ek yi han kitet yi wen
 eiyises menmen mirak werek werek eiriuwe menmen mi manpenuk
 enuk a? Taauye! ⁴Menmen yaaim iuwe God kerekyaayem kekre han ki
 hiram weinim a? Au, hiram menmen iuwe. ⁵Kenmak te hirak God kerek
 keweti Himin Yaaik kirak, hirak kiriak menmen yaaim mirak mirakel
 me his me yi mit? Hirak kiriakem kentar yi yises him nipaa Moses kewet
 mit em o yi yises him yaaim me Krai nipaa yi yemteuwe a? Me Krai
 keremem!

* 2:18 Ro 4:14, 11:6 † 2:19 Ro 7:6 ‡ 2:20 Jo 13:1; Ga 1:4

⁶“Haiu mertei menmen im mentar him me God nipaa mit profet newisim hiram matip Ebrahim kemtau him me God ketpiwekem hirak katip, “Him me God hiram yaaim. Maain hirak kakriakem.” Ebrahim han kitet kar ik te God katip hirak yaaik. ⁷Yi eiyrtei im e. Mit kerek hir han kitet God kakises menmen hirak ketpim, hir keriyen hir hiras nepenyerer ne Ebrahim nentar hir han kitet God nar ke nipaa Ebrahim han kitetik. ⁸^bGod nipaa enum eik kertei hirak han kitet mit ap ne Isrel hir yaain nanintar maain hir han kakitet hirak kakises him mirak. Te hirak kinin katip Ebrahim him yaaim mirak maain mamnen hirak ketpiwek him mar im: “Maain hi ariak yaaim me mit niutip niutip nerer wit wit henterit.” Ebrahim han kitet menmen im God ketpiwekem, hirak kakrekoyem, te God katip hirak yaaik. ⁹“Te neimin han kitet God kakriak menmen hirak ketpim, te hirak kaktip hir yaain nanir ke nipaa hirak katip Ebrahim hirak yaaik.

¹⁰^dTe mit kerek wen nises him nipaa Moses kewet mit em, God han enuk keriuweri kakiwaanki kakintar him yaaim mirak mau tiwei matip mar im: “Mit kerek nises him me God nipaa Moses kewisim mau tiwei, hir enises him mirak enepim, o au en, God kakiwaanki.” ¹¹“Him me God mau tiwei matip: “Mit kerek hir han kitet God kakriak menmen hirak ketpim, hirak kaktip hir yaain, hir nantike God nanu werek werek.” In ek, haiu mertei God ap katip mitik hak kiutip hirak yaaik kentar hirak kises him nipaa hirak kewet Moses em au. ¹²Menmen me mit nises him me Moses, hiram ap mar ke mit han kitet God kakriak menmen hirak nepei ketpim. Au, him me God mau tiwei matip mar im: “Mit kerek nises him me God Moses kewet mit em, hir enisesim enepim te hir nanu werek naninterim.”

¹³^gKrais hirak kekrehir kaiu, mit newaankek hirak kaa te hirak kekepai haiu minaaiwir menmen enum him me Moses matip mamwep. Him me God mau tiwei matip, “Mitik kerek mit natip hirak kaki hir nanwenkekik kaku nu, menmen im meteiknai haiu mit God kehimitanek hirak kakiwaankek kakit.” ¹⁴Te God kenip mit hir newaank Krais te menmen yaaim God nipaa katip Ebrahim em Jisas Krais kekepim hiram mamnen mit ap ne weiwik me Isrel. Hirak Krais kiriakem mar em, te haiu mit haiu mamit Himin Yaaik kirak nipaa hirak katip kaksuwarek kaknen, mentar haiu han kitet God kakriak menmen hirak nipaa katip hirak kakisesim.

Him Moses kewetaiyem ap mekrehir him nipaa God kewet Ebrahim em au

¹⁵Nai yinan, hi eteikni menmen im hi hetpiyem meriuwe menmen mit niriakem. Mitikit wik tatipakit menmen hirakit tatisesim, hirakit

^a 3:6 Jen 15:6; Ro 4:3 ^b 3:8 Jen 12:3; Ap 3:25 ^c 3:9 Ro 4:16 ^d 3:10 Diu 27:26
^e 3:11 Ro 1:17; Ga 2:16 ^f 3:12 Ro 10:5 ^g 3:13 Ro 8:3; 2Ko 5:21; Ga 4:5; Diu 21:23

tatwisim mamu tiwei me gavman. Ap te mitik keiyak kaknen kakwis him ham ke him im kaktip enum hirakit tewisim mau tiwei au. Hiram mamu mamit mamir ke nipaa hirakit tewisim. ¹⁶ ^hMar im God katip him yaaim men Ebrahim ketike nepenyek kirak. Him me God mau tiwei ap matip “nepenyerer nirak yapirwe” au. Hiram matip “nepenyek kerekek,” te hirak nepenyek kirak kiutip kerekek hirak Krai. ¹⁷ ⁱMenmen hi hetpi, han kai kar ik. Nipaa God katip Ebrahim him yaaim, God hirekes kakisesim. Hir mit newen tito tito neneiwewim ere God kewet Moses him ham hiram mikaru man mar ke 430 tito. Him im ap mekrehir minin him nipaa God katip Ebrahim em, te hiram weinim au. Hiram wen mepu. ¹⁸ Haiu mamit menmen yaaim em God nipaa katip kakwet Ebrahim em mamintar haiu mises him me God hirak nipaa katip Moses em, te him yaaim God katip Ebrahim em hiram enum memipin weinim. Au, hiram mamkepai haiu mamit menmen au. Haiu mamit menmen yaaim mamintar him God katip Ebrahim em. Me Moses taau!

¹⁹ ^jHim im yaaim kenmak te God katip Moses him a? God katip haiu mit him im, te hiram meteiknai menmen haiu miriakem hiram enum. Him me Moses mau tiwei naanmipre haiu mit ere nepenyek ke Ebrahim kaknen kerek nipaa God katip him yaaim me hirak. Mit ensel God kewetir him, hir natip Moses em. Moses hirak kerp nimin ke mit netike God katip mit him mirak hir newenhi nanisesim. ²⁰ Te God hirekes katip Ebrahim him yaaim. Mitik hak ap kerp nimin ketpiwek him au. Te God hirekes katip Ebrahim menmen hirak kakrekyiwekem. Mitik ap kerp nimin kenip Ebrahim kewenhi kakises menmen au. God katip hirak kakrekyiwekem weinim. Him im God katip Ebrahim em hiram minin him God katip Moses em mentar menmen im. (Mit ne Isrel ap nanises him nipaa hir newenhi nanisesim, God ap te kakwetir menmen. Te hirak kakwet Ebrahim menmen mirak weinim.)

Him me Moses naanmiprai metaihis haiu mamno mamises Jisas

²¹ ^kMekam? Him Moses kewet mit em hiram meremir him yaaim God kewet Ebrahim em? Taau! Him lo ham nipaa mepu hiram werek te mamkaap mit hir nantike God nankiyan nanu han kiutip, te God kaktip hir yaain nentar hir nises him im em. Te hiram mepu au. ²² ^lHim me God mau tiwei matip, “Mit yapirwe kerek hir niriak enum hir naniwaank nanit.” Hiram mamtip mar im te mit kerek hir nanises Jisas Krai, God kaktip hir yaain nanintar hir han kitet hirak kakises him nipaa hirak ketpim.

^h 3:16 Jen 12:7; Ap 7:5 ⁱ 3:17 Eks 12:40 ^j 3:19 Ro 5:20; Ap 7:38 ^k 3:21 Ro 8:2-4
^l 3:22 Ro 3:9-19, 11:32

²³ ^mNipaa him me Kraiss man wen au, him me Moses kewet mit em naanmiprai haiu emisesim ere God kakwepyapir menmen yaaim me Kraiss haiu emisesim. ²⁴ ⁿTe him Moses kewet mit em hiram meteiknai haiu enun, hiram menipai haiu hanhan mirir mamno haiu mamisesik, te God kaktip haiu yaain ap mamraiwaank mamantar haiu han kitet hirak kakises menmen nipaa hirak katip hirak kakisesim. ²⁵ In ek, him yaaim me Kraiss epei man, te him me Moses kerek nipaa mepu mekepai, in ek hiram nepei au meit.

Him hiram menipai mire nikerek ne God

²⁶ ^oYi yapirwe yi nikerek ne God yentar yi han kitet hirak kakises menmen nipaa hirak katip hirak kakisesim. Yi yetike Kraiss yi yau han kiutip yi nikerek ne God yentar nipaa yi mit miyapir ²⁷ ^pkerek mit han nikri neriuwe tipar hir nekine niuk me Kraiss, yi yaain yire Kraiss. Te God han kiteti yar ke hirak han kitet Kraiss. ²⁸ ^qHaiu mepu mar ik, te in ek mit hir ap nenke hasini pinan ne weiwik me Isrel o mit ap ne Isrel, o mit hir niriak wok ne mit hir naanmipri, o mit hir niriak wok nanit pewek mererim. Au, God han kitet menmen im hiram weinim. Haiu mit yapirwe haiu mipiran mentar haiu ne Kraiss Jisas. ²⁹ ^rYi ne Kraiss, te yi nepenyerer ne Ebrahim. Te maain yi eiyyit menmen yaaim nipaa God katip kakwet Ebrahim em.

Kraiss kekepai haiu wok mit haiu mamre nikerek ne God

4 ¹ Him mai hiram im. Nikan ke mitik hak hirak kakit menmen me haai irak naanmamprewem, te hirak wen kike, hirak kaktiwem au. Hirak kire mitik kiriak menmen me mitik iuwe naanmirewek o haai kirak weinim. ² Hirak wen kike hirak ekises him me mit hir naanmiprewek ketike menmen mirak ere wi haai kimat hirak kaktiwem. ³ ^sNipaa haiu mire nikerek ein e. Haiu mises him me God nipaa ensel newet haiu mit em, hir ninin naanmiprai nar ke mit naanmire mit nekre winak enuk. ⁴ ^tTe maain wi epei man nipaa God kehimitanem, te hirak keriuwet nikan kirak kan ti keweikin kire mitik. Mite hap hire winaak hirak kire nikan kiutip ke Isrel, te hirak ekises him nipaa Moses katip mit ne Isrel em. ⁵ ^uHirak kiriak menmen im te hirak kakikepai kaktaihis haiu mit kerek mises him me Moses, te haiu mamnaaiwir him im naanmiprai haiu mamre nikerek iuwe ne God, haiu mamit menmen hirak nipaa ketpai kakwetaiyem.

^m 3:23 Ga 4:3 ⁿ 3:24 Ro 10:4 ^o 3:26 Jo 1:12 ^p 3:27 Ro 6:3, 13:14 ^q 3:28 Ro 10:12;
1Ko 12:13 ^r 3:29 Ro 4:13 ^s 4:3 Ga 3:23; Kl 2:20 ^t 4:4 Ef 1:10; Jo 1:14; Ro 1:3 ^u 4:5 Ga
3:13

⁶Yi nikerek nirak iuwe, te God keriuwet God Himin Yaaik kerek kau kekrek han ke nikan kirak Jisas, hirak kan kekrek han ki. God Himin Yaaik kenipai haiu han yaaik matip God him iuwe mar ik: “Ti Haai kiau! Ti Haai kiau!” ⁷W^Tis, in ek yi ap yire mit enun nepu nekrek winak enuk au. Yi nikerek iuwe ne God keriyen. Yi yises Krai, te yi nikerek iuwe ne God, te yi eiyyit menmen yapirwe God kehimitenaiyem haiu nikerek nirak.

Pol han kitet mit ne provins Galesia

⁸Nipaa yi ap yertei God, yi mit ap ne weiwik me Isrel. Yi yises him me tipir o menmen hiram ap te mamweikin mamre God taau. ⁹Te in ek yi yertei God. Yi hiras yerteiyek au. Hirak kehimiteni yi nirak. Te yi yenmak yi hanhan pike eiyyises him weinim hiram mar ke menmen weinim me tipir nipaa yi yisesim a? ¹⁰Yi yises menmen im, yi han kitet God katip yi yaain yayintar menmen yi yiriakem hiram mises menmen me wi o wenke o tito nipaa Moses katip yi mit yi eiyyisesim einapen menmen me wi im. ¹¹Hi han kitet yi mit, hi hinaain menmen hi herekiyiem hiram mamre weinim mentar in ek him im yi yisesim, hiram him weinim mar ke him weinim nipaa yi yisesim.

¹²Nai yinan, hi hetpi him manp. Hi hanhan yi eiweikin sip eiwet him me Moses eiyyir ke hi. Hi epei heweikin sip hewetiwek, te hi har ke yi mit kerek nipaa him me Moses ap minin naanmipri au. Nipaa yi ap yerekyo enum au, te in ek hi hertei yi ap eirekyo enum. ¹³Yi yertei nipaa hi hinin han hiri hentar hi hinap, te hi heweikin han kai ap hen wit hak au. Hi han hetpi him yaaim me Krai. ¹⁴Menmen enum meiyep hi hinap hiram enum me han ki, te yi ap yineina yeweikin sip yeweto au. Yi yetauhis yi yatip yar ik: “Ti yaaik har ke mitik ensel ke God.” Yi yetauhis yar ke Krai Jisas kaknen yi eitiwekhis. ¹⁵Nipaa yi han yaaik hi han hiri hekepi. In ek yi han kiteta mekam a? Hi etpi menmen im me yi mit. Nipaa hi hepu hetikewi yi hanhan yeriuwa iuwe, te yi han kitet yar ik: “Haiu emketet nanamir kiau emwet Pol em emkepik kir ein ein werek werek, te haiu emketim.” ¹⁶Nipaa yi hanhana iuwe yar ek, te in ek hi hire mitik kepan ke yi mit hentar hi hetpi him yaaim a? Taauye!

¹⁷Mit han ein kerek hanhan yi yekir yink ki hir neweninipi hanhani me menmen yaaim au. Hir hanhan nanri han ki, te yi ap han kiteta au. Hir hanhan yi hanhani yaitip hir yaain yar ke hir natip hir hanhani. ¹⁸Te yi eiyyisesi yi yetike mit han hanhanan me menmen yaaim, hiram werek. Hiram yaaim te hi hepu o au, yi eiriakem. ¹⁹Nai yinan yaain, hi pike hire mite weteiknen wawine nikan hak. Hi pike han enuk har ke nipaa hi han enuk hemerir yi mit ere yi yises Krai werek werek. In ek hi pike han

^v 4:6 Ro 8:15-16 ^w 4:7 Ro 8:17; Ga 3:29 ^x 4:8 1Ko 8:4-6 ^y 4:10 Ro 14:5; Kl 2:16

^z 4:13 1Ko 2:3 ^a 4:16 Emo 5:10

enuk hemeryi yi mit pike eiyises Kraiss werék werék, yi eitikerek eiyu han kiutip. ²⁰Hi hanhan hi hahu etikewi, te hi ap hetpi him manp heriuwe tiwei im keremem. Au, hi hanhan hahirp ninaan mi hertei han ki, te hi etpi him hiram mamkepi. Au, hi hepu yanimin, te hi hepitari hi heni o hi hetpi him yaaim.

Him tok piksa me Sera wetike Hega

²¹Yi mit kerek yi hanhan eiyises him lo me Moses eiyirteiyem werék werék, hi hetpi him me him lo mirak. ²²^bHim me God mau tiwei matip Ebrahim kine nikerek hirakit wik. Hega kerek hire wiriak menmen me Sera, hire wine nikan kiutip, Sera hire wine nikan hak kiutip kikaru, te hire winin mite pe Ebrahim. Hega wikaru. ²³^cNikan kirak kerek mite Hega winaak, hire winaak wentar Ebrahim keriya kiwaai ketikerep kerep, te hire wetu. Te nikan kirak kerek Sera winaak, hire winaak wentar God katip him yaaim hirak kekepiye te maain Ebrahim kiwaai ketikerep hire wetu. ²⁴⁻²⁵^dHim im hiram mire piksa meteiknai menmen. Miyapir wik hir nehimitan him wik nipaa God kewetei haiu mit em. Hega hire wehimitan him nipaa God kewet Moses em keit miniu (o neiyip) niuk mirak Sainai. Niuk ik Hega hiram mehimitan miniu (o neiyip) Sainai meit wit Arebia. Wit Jerusalem ke mit ne Isrel ketike mit miyapir nau nekrerek hir nar ke mite ip Hega. Hega wine nikan, te hirak ekriak menmen ekir ke miye pirak wiriakem. Hirak ekriak menmen me mit te hirak ap kakit pewek emrerim au. Te mit miyapir kerek nises him me Moses hirak kehimiteni, hir nises him me Moses, hir han kitet God katip hir yaain. Te him ap mamkepi hir nire yaain au. Hiram mamiwaanki. ²⁶^eSera hire wire him ham God kewet Ebrahim em. Hire wehimitan wit Jerusalem ke wit ke God. Hire wepu werék war ke mite ap wau wekre winak enuk, te hire enu tenmin (o rumaa). Wit Jerusalem keit wit ke God ap kises him me Moses au. Hirak kinaaiwir menmen im. Haiu mit miyapir kerek mises him yaaim me Kraiss, hire miye paiu, haiu mire nikerek nire. ²⁷^fHim me God mau tiwei matip Jerusalem keit wit ke God maain kaknen kakinin wit Jerusalem in ek kau ti. Haiu mertei him im yaaim mentar him me God Aisaia kewisim hiram matip him tok piksa mehimitan wit wik tire miyapir wik. Hiram matip mar im:

“Ti mite tenmin (o rumaa) ap nipaa ti hine nikerek, ti han yaaik ehu. Ti enepir esikeyaanmi han yaaik, ti mite ap nipaa ti epitu te ti eteiknen. Hire kerek wepu war ke mite ap weit mitik au, hire wawine nikerek yapirwe naninin nikerek ne mite wepu war ke mite kerek hire weit mitik ek wine nikerek yapirwe.”

^b 4:22 Jen 16:15, 21:2 ^c 4:23 Ro 9:7-9 ^d 4:24 Ro 8:15; Ga 5:1 ^e 4:26 Hi 12:22; Rev 3:12, 21:2, 10 ^f 4:27 Ais 54:1

²⁸⁸Nai yinan, yi yertei Aisak hirak nikan ke Ebrahim kentar him God ketpiwekem. Mar im haiu mire nikerek ne Ebrahim mentar him nipaa God ketpiwekem. ²⁹Nipaa nikan mite Hega winaak wentar mitik kire kiwaai ketikerep weinim, hirak kiriak enum me nikan hak God kikaap mite tenmin (o rumaa) Sera te hire winaak. In ek mit nises him me Moses nerekyei haiu mit kerek God Himin Yaaik kekrai, hir nerekyei enum, nar ke nipaa nikan eik enuk kiriak enum me nikan yaaik ek. ³⁰⁹Him me God mau tiwei matip mekam? Hiram matip,

“Eiyipir mite wiriak menmen me mite hap weinim hire wetike nikan kire enuk. Nikan kire ap kakit menmen me haai kirak ketike nikan nipaa God kikaap mite enun tenmin (o rumaa) hire winaak.” Te yi eiweikin sip eiwet him enum mit in enun netpiyem me yi eirekir yink ki. Him im mewaank han ki enuk mar ke mit hir nepu winak enuk. ³¹ⁱTe nai yinan, haiu ap mire nikerek ne mite wiriak menmen me mite hap weit pewek weriuwerem weinim au. Te haiu ap emises him me nipaa mit ne Isrel nisesim. Au, haiu mire nikerek ne mite enu tenmin (o rumaa) kerek God kekepye, hire wine nikan, kentar haiu han kitet God kakises him mirak kekepai kaktaihis kar ke nipaa hirak ketpim.

Krais keriyei haiu menpin mekeipin him lo me Moses, haiu ap pike emi

5 ¹ⁱKrais epei keriyei haiu mit haiu minaiwir him me nipaa ein mar ke mit netpan ninaaiwir winak enuk, te haiu emu werek emises him me Krais. Te yi einakin tokim ap eiwis mit neriyei yi pike eiyisesim him me nipaa eiyir ke mit pike nanino nanikre winak enuk ek au emit!

²Nikip emnep eiyimewem. Hi Pol hetpi menmen im. Yi mit kerek eiwis mit han nanrekir yink ki, te God kaktip yi yaain, menmen Krais kerekuyem kakikepi kaktihis, hiram ap mamkepi te God kaktip yi yaain au. ³Hi etpi him manp eteipim. Mit kerek hir newis mit nerekir yink kir, te God kaktip hir yaain, hir enises him ham yapirwe me Moses keremem, kerek nipaa hirak katip mit ne Isrel em. ⁴Yi mit kerek yi yises him me Moses, te yi hanhan God kaktip yi mit yaain, yi epei yeweikin sip yewet Krais. Yi yeweikin sip yewet menmen yaaim God kerekuyem weinim. Te in ek hirak ap kakikepi kakrekuyi yaaim kakikepi au. ⁵Haiu mit in meriuwe menmen iuwe me God Himin Yaaik kekepai, haiu han kitet hirak kakises him yaaim mirak, te haiu memeriruwewek hirak kaktip haiu mit haiu yaain hirak kaktaihis. ⁶ⁿHaiu mit metike Jisas Krais haiu niutip, te haiu merekir yink kiau o au, hiram menmen weinim ap te mamkepai God kaktip haiu yaain au. Menmen im keremem hiram iuwe. Haiu han

⁸ 4:28 Ro 9:7; Ga 3:29 ⁹ 4:30 Jen 21:10; Jo 8:35 ⁱ 4:31 Ga 3:29 ʲ 5:1 Jo 8:32, 36; Ga 2:4, 5:13; Ap 15:10 ⁿ 5:6 1Ko 7:19; Ga 6:15

teweninan miriak menmen yaaim mentar haiu han kitet menmen werék werék me God haiu misesim.

⁷Nipaa yi yises him yaaim me God werék werék, te in ek neimin neiyepet han ki, te yi ap yises him yaaim mirak werék werék au a? ⁸^lGod kerek kehimiteni te yi yisesik, hirak ap kari han ki te yi ap yises him im yaaim au. ⁹^mHaak ke sak neniuk, hirak menmen kike, te yi yenkerek werék werék au, hirak kewep keneises sak naan, mit ap te nanik taau. Menmen enum yi yisesim me yi yerekir yink ki, hiram kike, te maain hiram mamíwaank menmen yaaim in ek yi yisesim. ¹⁰^aHi hertei Mitik luwe kakikepi, te yi ap han kitet him ham me him nipaa hi etpiyem au. Te mit kerek hir nari han ki God kakrekoyor enum mamrer me menmen enum hir epei nerekiyiem.

¹¹^oNai yinan, hi wen hatip mit heriyai heriyai hir enrekir yink kir enises him yaaim me Kraiss, nenmak te mit kerek nises him me Moses hir wen nerekyo enum a? Hi wen hatip mit enrekir yink kir te him me Jisas hirak kaa kentar nu tentarakit hiram ap te mamriak mit in han kir kekrit enum neriuwa au a? ¹²Hi hanhan hir mit kerek hir nari han ki hir nanrekir yink kir te mit nanriuwesisi hir ap nanu nantikewi nanri han ki neriuwe him mir, te yi yisesim au.

¹³^pNai yinan, God kehimiteni yi apeí yinaaiwir menmen enum nipaa yi han ki hirak kisesim, hiram mar ke mitik kau winak enuk, te yi yau werék werék. God keriyei (o keryiyi) yi epei yinaaiwir menmen im, te yi ap eiwis han ki ekitet menmen enum me ti menterim au emit! Hirak keryiyi yinaaiwir menmen enum te yi eikepan eiyses menmen yaaim yentar yi han teweninan. ¹⁴^qHim yapirwe nipaa God katip Moses em, hiram mire him miutip im mau mekrerem hirak ketpim. Hiram matip mar im: “Yi han etwenin eikaap mit miyapir nau menep yar ke yi han tewenin hiras.” Yi eiriak menmen mar im, te yi eiyses menmen iuwe him mirak metpim. ¹⁵Yi hemkre menepam me menmen yi yenehan yenehan yentar menmen, te yi naanempre hiras te yi ap eiwiwaank hiras eitike menmen yaaim me Kraiss yi yisesim. Mit kerek nenehan nenapan me menmen, hir enun nar ke miyaak me yaank menepam meketet patin maam naan me han em.

**God Himin Yaai kiriak menmen yaaim,
han kaiu kiriak menmen enum**

¹⁶^rHi hetpi him im. Yi eiwis God Himin Yaai kakikepi yi yayises him yaaim me Kraiss, te yi ap eiyses menmen enum han ki hanhanem. ¹⁷^sHi hetpi him im hentar menmen enum me ti han ke mit hanhanem, hiram

¹ 5:8 Ga 1:6 ^m 5:9 1Ko 5:6 ⁿ 5:10 Ga 1:7; 2Ko 11:15 ^o 5:11 1Ko 1:23 ^p 5:13 1Pi 2:16
^q 5:14 Lev 19:18; Mt 5:43; Ro 13:9 ^r 5:16 Ro 8:4 ^s 5:17 Ro 7:15-23; 1Pi 2:11

ap mire menmen God Himin Yaaik hanhanem. Menmen God Himin Yaaik hanhanem ap mire menmen enum me ti han ke mit hanhanem. Te hiram mire mit enun nepan mari han ki heriyai heriyai. Hiram mari han ki heriyai heriyai, te yi ap eiyises menmen werek werek yi hanhan eiriakem. ¹⁸Yi eiwis God Himin Yaaik naanempri kakri han ki ketpi menmen yaaim yi eiyisesim, te yi ap eiyises him me Moses te God kaktip yi yaain.

¹⁹Menmen han ke mit kiriakem haiu merteiyem, hiram im: Mit miyapir nariyanhis neweninem, hir hanhan me menmen enum im em, hir niriak mit miyapir yink enuk neriuweri. ²⁰Hir nises tipir newenipi niuk mir, o hir niriak nasi, o han enuk neriuwehan, o hir nenehan me menmen, o hir hemkre menepam neriuwe menmen, han kekrit te mit natip enum, mit neit menmen yeunim nanwet mit han em au. Mit nenke hasini nises menmen ham menmen ham. ²¹Hir han kitet menmen enum me mit han o hir nenep mit nani, o hir naam tipar si enum ere hir netaritari, o hir nanino nanrer wit wit nanine henye me menmen enum, o menmen menmeyiam enum mar im. Nipaa hi epei etpi, te in ek hi etpi eteipim. Mit kerek hir niriak menmen mar im, hir ap nanu nantike God nanit menmen yaaim nipaa God ketpim kakwet mit em au.

²²Te menmen God Himin Yaaik kikaap mit enisesim, hiram im: Mit han tewenina God ketike mit, hir han yaaik nanu, han kir kau werek werek, hir ap han enuk waswas au, hir niriak mit menmen yaaim, hir nikaap mit han weinim, hir nises him nipaa hir natip mit hir nanisesim. ²³Hir hanhan neriuwe mit han, hir newenin han kir me menmen. Menmen mar im mit nisesim, him lo ap matip hiram enum au. Hiram matip hiram yaaim. ²⁴Mit hir ne Krai Jisas, hir nar ke mit naa netike Krai nau nu tentarakit, te menmen enum me ti nipaa hir nisesim niriakem, hiram ap mau mamkre han kir au. Hiram menmen enum han ke mit niriakem o menmen enum han kir hanhan neriuwerem, te in ek hir nepirem mamno hiram mami mamit.

²⁵God Himin Yaaik kenipai haiu metike God Haai kaiu haiu mau niutip haiu mepu mar ek. Te haiu emwisik hirak naanempri han kaiu me menmen yapirwe. ²⁶Haiu ap mewenipi niuk maiu haiu iuwe au, haiu ap emkiakan han emket han em me menmen au, haiu ap hemkre menepam me menmen maiu haiu miriakem o menmen meiyam au emit!

Yi eikaap ni yinan me menmen yapirwe

6 ¹Nai yinan yi eiyir mitik hak kiriak menmen enum, yi mit kerek God Himin Yaaik naanmpre han ki yi hanhan eiriuwerek eikepik

¹ 5:18 Ro 6:14, 8:14 ² 5:19 1Ko 6:9-10 ³ 5:22 Ef 5:9 ⁴ 5:23 1Ti 1:9 ⁵ 5:24 Ro 6:6; Kl 3:5; 1Pi 2:11 ⁶ 5:25 Ro 8:4 ⁷ 5:26 Fl 2:3 ⁸ 6:1 Mt 18:15; Je 5:19

pike ekises menmen yaaim mar ke nipaa hirak kisesim. Te yi naanempre hiras eiwenin han ki me wi yi han kitet yi yises God werek werek, te menmen enum mamnen mamri han ki, te yi yairiak menmen enum ye. ^{2b}Yi eikapan me menmen mamnen mamrekyi han ki enuk, te mar im yi eyises him me Kraiss nipaa hirak ketpim me yi han teweninan eikapan. ³Hi hatip menmen im hentar mit kerek han kitet hir iuwe ninin mit han ap te nankepi, hir newises hiras natip nare hir iuwe. Te hir au, hir mit weinin. ^{4c}Yi mit niutip niutip han ekitet menmen yi hiras yiriakem. Hiram yaaim te yi hiras han yaaik eiriuwerem. Yi ap han ekitet menmen mit han niriakem, te yi eyininini o au. Menmen im emit! ^{5d}Yi ap eiriak menmen im eyiyantar yi yises menmen enum mitik hak kiriakem, te maain yi niutip niutip God kakitih i yenmak yi yiriak menmen yi yiriakem, hirak han ekitet menmen miutip miutip. ^{6e}Hir mit kerek mitik hak kan ketpor keteiknor him yaaim me God, hir eninkiwek menmen ham me menmen yaaim mir hir naanemprewek nanriuwerem.

⁷Yi ap eimitetpin hiras. Yi ap eimipin God me menmen au emit! Menmen mit niriakem nisesim, maain hir enit menmen yaaim o enum mamrim me wi God han kakitet menmen haiu mit miriakem. Hiram mar ke mitik kamir ni. Hirak kamir menmen yaaim, maain hirak kakit menmen yaaim. Hirak kamir menmen enum mire napik tomik o menmeiyam, maain hirak kakit menmen enum mar im keremem. ^{8f}Mit han niriak menmen nises han kir enuk, te maain han kir kakiwaank kakit. Menmen im hiram mar ke mitik kamir napik tomik mau ni mirak. Mit kerek hir niriak menmen nises God Himin Yaaik, maain hirak kakikepi nanu nanit nantike God tipmain tipmain enum eik. Menmen im hiram mar ke mitik kamir menmen yaaim mau ni, maain hirak kakit menmen yaaim. ^{9g}Menmen yaaim yi yiriakem yisesim, te yi ap einapen eyisesim eyiyantar yi yiriakem hekrit hekrit au. Maain ere wi God kimat haiu mamit menmen yaaim, te haiu ap mamnapen mamriak menmen yaaim em. ¹⁰Tis, hekrit hekrit haiu mau ti ik e, haiu emriak mit menmen yaaim, te naiu yinan kerek nises him yaaim me Kraiss, haiu emrekyor menmen yaaim iuwe.

Pol han yaaik keriuwe Jisas nipaa kaa kentar nu tentarakit

¹¹Yi eyiyar yaan mai iuwe hi hirekes ewisiyem heriuwe his mai, te yi eyirtei hi Pol hirekes hewisi tiwei ik e. ^{12h}Mit kerek hir hanhan mit han nanwenipi niuk mir natip hir yaain nises God werek werek, hir netpi yi eirekir yink ki. Te hir niriakem nentar hir ninapen mit ne Isrel naninip nanrekyor enum nanintar hir natip him yaaim me Jisas Kraiss kerek nipaa

^b 6:2 Ro 15:1 ^c 6:4 1Ko 11:28; 2Ko 13:5 ^d 6:5 Ro 14:12 ^e 6:6 1Ko 9:11, 14 ^f 6:8 Jo 3:6, 6:63; Ro 8:13 ^g 6:9 2Te 3:13 ^h 6:12 Ga 5:11; Fl 3:18

kaa kentar nu tentarakit, te God kakikaap haiu mit kaktaihis. ¹³Mit kerek hir nerekir yink kir ap nises him me Moses yapirwe au. Hir nises menmen miutip im keremem. Hir hanhan nerekir yink ki nentar hir nanit niuk iuwe me mit ne Isrel, hir nanwenipiri naninterim. ¹⁴Te hi kerekek hi han kitet hi ewenipi Jisas kerek nipaa kaa kentar nu tentarakit. Hi heriuwe menmen im me Kraiss, hi har ke mitik kaa, menmen enum me ti ap te mamri han kai. Hi han kitet menmen me ti mit nisesim hiram mar ke menmen epei maa au meit, te hi ap hanhan heriuwerem meiyam taau. ¹⁵Mit hir nerekir yink ki o au, hiram menmen weinim. Hiram ap mamkaap mit te God katip hir yaain au. Hirak God kerekek kenip mit hir neweikin nire mit han yaain. Menmen im hiram menmen iuwe. ¹⁶Hi hanhan yi mit kerek yi yises him hi epei hetpiyem, yi yetike mit nerer wit wit neit Isrel hir nises him yaaim me Kraiss. Hi hanhan God hanhani kakrekyor yaaim, te hir nanu werek werek.

¹⁷In ere maain, hi hinapen mitik hak kiutip kaktip God kehimitena hi ap aposel au, hentar mit neiyep yapirwe hentar hi hiriak menmen me Mitik luwe Kraiss, te sak yapirwe mau yink kai meteikin mit hi mitik ke Jisas Kraiss kerekek. ¹⁸Nai yinan, hi hanhan kaiu luwe Jisas Kraiss han yaaik kirak, hirak kaku kaktikewi kakikre han ki.

Mepir keremem

ⁱ 6:14 1Ko 1:31, 2:2 ^j 6:15 Ga 5:6; 2Ko 5:17 ^k 6:17 2Ko 4:10